




## KOMUNIKADO PA PRENSA

### Temporada di orkan 2013: Sea prepará!

Promé di yùni (djasabra awor) temporada di orkan 2013 p'e Área di Orkan Atlántiko (Osean Atlántiko Nort, Laman Karibe i Golfo di Mexico) ta kuminsá ofisialmente. Vários perspektiva pa temporada ta indikando ku e temporada aki lo bira bastante aktivo (75% riba promedio).

E tim di *Colorado State University* (CSU), ku ta ser dirigí dor di Dr. Phil Klotzbach i Dr. William Gray, ta pronostiká ku un kantidat di siklon tropikal riba promedio lo desaroyá durante di temporada di orkan 2013. Sigun e pronóstiko aki, 18 tormenta ku nòmber (promedio ta 12 tormenta tropikal) lo forma. Di esakinan, nuebe lo alkansá forsa di orkan (promedio ta 6.5) miéntras ku di esakinan, kuater (promedio ta dos) lo bira orkan fuerte (kategoria 3 te 5). *National Oceanic and Atmospheric Administration* (NOAA) na Merka tambe ta antisipá un temporada ku aktividat riba promedio. E pronóstiko aki ta indiká ku 13 pa 20 tormenta ku nòmber lo forma e aña aki. Di esakinan, shete pa diesun lo tin di bira orkan i tres pa seis, sigun ta antisipá, lo bira orkan fuerte.



Imágen di satelit "infrared" tumá na momentu ku Orkan Sandy tabata yegando parti ost di Cuba anochi di 24 di òktober 2012

Datonan klimatológiko, ku CSU a kolektá, ta indiká ku for di 1900 tabatin sinku temporada den kua kondishonnan atmosférico i oseánico tabata komparabel ku e aña aki. E añanan aki tabata 1915, 1952, 1966, 1996 i 2004. Na 1915 tabatin dos orkan ku a pasa den parti oriental di Área di Karibe. Esakinan tabata durante di respektivamente ougùstùs i sèptèmber. Na 1952, parti pariba di Karibe tabata bastante tranquil, pa loke ta trata siklon tropikal. Na 1966 Orkan *Faith* a pasa 26 di ougùstùs djis nort di Islariba. Mas o ménos un luna despues (27 di sèptèmber) Orkan *Inez* a pasa na un distansha di algu mas ku shen kilometer sùit di Islariba. Dia 8 di yùli di 1996, Islariba mester a dil ku pasashi di Orkan *Bertha* i mas lat e mesun luna ei, Tormenta Tropikal *Cesar* a pasa hopi serka di Islanan ABC, dia 25 di yùli. Den ámbos kaso práktikamente no tabatin daño kousá dor di e sistemanan aki. Durante di anochi di 8 di sèptèmber 2004, sentro di Orkan *Ivan* a pasa nort di Islanan ABC na un distansha di mas o ménos 130 kilometer. Mardugá di 10 di sèptèmber 2010, Aruba a haña algun áwaseru hopi fuerte ku welek ku bos i tambe inundashon, ku tabata un konsekuensha dirèkt di *Ivan*.

Servisio Meteorológiko Kòrsou (SMK), komo fuente ofisial pa pronóstiko di wer i atvertensha, na komienso di temporada di orkan, ta urgi pa outoridatnan i públiko en general riba nos islanan prepará nan mes pa posibel menasa di un tormenta tropikal òf orkan.

Pronóstiko i atvertensha lo ser publiká riba nos website, <http://www.meteo.an> i por sigui nos tambe via di nos página di Facebook, via di <http://www.facebook.com/meteo.curacao>.

Manera ta kustumber, SMK lo vigilá tur disturbio ku ta forma menasa pa Kòrsou, Boneiru, Saba i Sint Eustatius ku hopi atenshon. Den kaso ku esei ta nesesario, SMK lo emití vigilansha, alerta òf atvertensha, kompañá pa e kódigonan di koló ku ta hor serka di esakinan, p'e islanan aki, pa di e manera aki sostené akshonnan ku ta ser rekomendá dor di outoridatnan.

E peligernan mas grandi ku siklonnan tropikal ta kousa ta:

- Bientu hopi duru,
- Laman hopi brutu i haltu na kosta i
- Áwaseru na kantidat grandi i di durashon largu

E nòmbernan prepará p'e temporada di orkan aki ta: *Andrea, Barry, Chantal, Dorian, Erin, Fernand, Gabrielle, Humberto, Ingrid, Jerry, Karen, Lorenzo, Melissa, Nestor, Olga, Pablo, Rebekah, Sebastien, Tanya, Van* i *Wendy*.

